

মুক্তিযুদ্ধে মার্কিন যুক্তরাষ্ট্রের ভূমিকা

বাংলাদেশের মুক্তিযুদ্ধে মার্কিন যুক্তরাষ্ট্রে ভূমিকা ছিল খুবই হতাশাবাঞ্জক ও বিতর্কিত। মার্কিন সরকারী নীতি পাকিস্তানপন্থী হলেও কংগ্রেস এবং সিনেটের বিপুল সংখ্যক সদস্য, সরকারি কতিপয় আমলা ও বুদ্ধিজীবী মুক্তিযুদ্ধের প্রতি সমর্থন ব্যক্ত করেন। মার্কিন গণমাধ্যম, জনমতও ছিল বাংলাদেশের প্রতি সহানুভূতিশীল। তবে তৎকালীন নিক্সন, বোজার্স ও ড. কিসিঞ্জার প্রশাসন পুরো ন'মাস পাকিস্তানের জন্য নৈতিক, রাজনৈতিক, অর্থনৈতিক ও সামরিক সমর্থন যুগিয়েছে। বাংলাদেশের মুক্তিযুদ্ধে মার্কিন নীতির চারটি পর্যায় ছিল।

মার্কিন নীতির প্রথম পর্যায় (মার্চ থেকে জুলাই পর্যন্ত) : এ পর্যায়ে মার্কিন নীতির প্রকৃতি ছিল কৌশলগত নিরপেক্ষতা। এ সময় মার্কিন সরকার বাংলাদেশ সমস্যাতে পাকিস্তানের 'অভ্যন্তরীণ ব্যাপার' হিসেবে অভিহিত করে। কিন্তু ভারতে নিযুক্ত মার্কিন রাষ্ট্রদূত কেনেথ কীটিং ওয়াশিংটনের এই দৃষ্টিভঙ্গির বিরোধিতা করে ১৫ এপ্রিল বলেন, পূর্ব পাকিস্তানের ঘটনা কোনোভাবেই অভ্যন্তরীণ ব্যাপার হতে পারে না এবং অভ্যন্তরীণ ব্যাপারের অজুহাতে সারা বিশ্ব দৃষ্টি ফিরিয়ে রাখতে পারে না। পত্র-পত্রিকার প্রতিবাদ ও প্রবল জনমতের চাপে ৭ মে ওয়াশিংটন পাকিস্তানের জন্য সমরাস্ত্র সরবরাহ ও আর্থিক সাহায্য স্থগিত রাখার সিদ্ধান্ত গ্রহণ করে। এছাড়া ১২ জুন ১৯৭১ নিক্সন প্রশাসন পূর্ব পাকিস্তান সমস্যার রাজনৈতিক সমাধানের আহ্বান জানান। তবে অস্ত্র সাহায্য বন্ধ থাকলেও প্রচুর মার্কিন অস্ত্র পাকিস্তান যাচ্ছে বলে পত্র-পত্রিকায় সমালোচনা শুরু হলে পররাষ্ট্র দপ্তর থেকে বলা হয় যে, অস্ত্রগুলো সরবরাহের জন্য ২৫ মার্চের আগেই চুক্তি স্বাক্ষর করা হয়েছিল। জুনের শেষ নাগাদ মার্কিন সরকার পাকিস্তানের সঙ্গে ৪.৩ মিলিয়ন ডলারের দুটি চুক্তি করে যে অর্থ বাঙালি হত্যাযজ্ঞে ব্যবহৃত হয়। তবে পাকিস্তানে অস্ত্র পাঠানো সত্ত্বেও জাগ ও পুনর্বাসন কার্যক্রমের জন্য এসময় যুক্তরাষ্ট্র ভারতকে সাহায্য পাঠানো অব্যাহত রাখে। মে মাসের মধ্যে যুক্তরাষ্ট্র ভারতের শরণার্থীদের জন্য ৩০ লক্ষ মার্কিন ডলার সাহায্য দেয়। অবশ্য এর উদ্দেশ্য ছিল হোয়াইট হাউস বিরোধী সমালোচনার তীব্রতা কমিয়ে আনা এবং সাহায্য অব্যাহত রেখে রাজনৈতিক সমাধান খুঁজে বের করার জন্য প্রেসিডেন্ট ইয়াহিয়ার ওপর চাপ সৃষ্টি করা।

মার্কিন নীতির দ্বিতীয় পর্যায় (জুলাই থেকে আগস্ট ১৯৭১ পর্যন্ত) : বাংলাদেশের মুক্তিযুদ্ধে মার্কিন নীতির দ্বিতীয় পর্যায় শুরু হয় জুলাই মাসে। এ পর্যায়ে মার্কিন নীতির দু'টি বৈশিষ্ট্য লক্ষ্য করা যায়। ১. রাশিয়াকে প্রতিরোধে মার্কিন যুক্তরাষ্ট্র চীনকে স্বীকৃতি এবং জাতিসংঘের সদস্যপদ লাভের প্রতিশ্রুতি দেয়। এ উদ্দেশ্যে হেনরি কিসিঞ্জারের হঠাৎ করে বেইজিং সফরের ফলে যুক্তরাষ্ট্রের পাকিস্তান ঘেঁষা নীতি সক্রিয় হয়ে ওঠে। ২. যুক্তরাষ্ট্রের ধারণা হয়েছিল যে পাকিস্তানের বিরুদ্ধে সামরিক অভিযানে জুলাই মাসে রুশ-ভারত পরিকল্পনা চূড়ান্ত করা হবে। তাই এ পরিকল্পনা মোকাবেলায় যুক্তরাষ্ট্র

তৎপর হয়। দ্বিতীয় পর্যায়ে যুক্তরাষ্ট্রের মূল লক্ষ্য ছিল অখণ্ড পাকিস্তানের অধীনে একটি রাজনৈতিক সমাধান খুঁজে বের করা এবং যুদ্ধ এড়িয়ে যাওয়া। কিন্তু কোনোটিই সম্ভব হয়নি। কাজেই দ্বিতীয় পর্যায়েও মার্কিন নীতি সম্পূর্ণ ব্যর্থ হয়।

মার্কিন নীতির তৃতীয় পর্যায় (সেপ্টেম্বর-৩ ডিসেম্বর ১৯৭১) : এ পর্যায় নিম্ন প্রশাসন আরো বেশি পাকিস্তানপন্থী নীতি অবলম্বন করে। কলকাতায় অবস্থানকারী বাঙালি নেতৃবৃন্দের একাংশের সঙ্গে (খন্দকার মোশতাক আহমদপন্থী) শেখ মুজিবকে মুক্তি দিয়ে পাকিস্তানের সঙ্গে সমঝোতার চেষ্টা করে। এ ছাড়াও পাকিস্তান সরকারকে বাংলাদেশ সমস্যা সমাধানের জন্য চাপ দেয়। যদিও মুজিবনগর ও ভারত উভয় সরকার মার্কিন এ উদ্যোগ প্রত্যাখ্যান করে। এমনকি ৫-৮ নভেম্বর ভারতের প্রধানমন্ত্রী ইন্দিরা গান্ধী ওয়াশিংটন সফরকালে মার্কিন যুক্তরাষ্ট্রকে পাকিস্তানপন্থী নীতি থেকে সরিয়ে আনতে ব্যর্থ হন। ফলে একটি যুদ্ধ যে অনিবার্য তা পরিষ্কার হয়ে যায়।

মার্কিন নীতির চতুর্থ পর্যায় (ডিসেম্বর ১৯৭১) : ৩ ডিসেম্বর পাক-ভারত যুদ্ধ শুরু হওয়ার পর থেকে যুক্তরাষ্ট্র প্রচণ্ড ভারত বিরোধী ও পাকিস্তানে ঘেঁষা নীতি অনুসরণ করতে থাকে। পাকিস্তানকে যাবতীয় নৈতিক ও কূটনৈতিক সমর্থন দানের জন্য প্রেসিডেন্ট নিম্ন হেনরি কিসিঞ্জারকে নির্দেশ দেন। নিম্নের এ নীতিকে 'Tilt Policy' নামে অভিহিত করা হয়েছে। ৬ ডিসেম্বর যুক্তরাষ্ট্র ভারতের জন্য ৮৬.৬ মিলিয়ন ডলার আর্থিক সাহায্য সাময়িকভাবে বন্ধ ঘোষণা করে। অপরদিকে জাতিসংঘের মাধ্যমে কূটনৈতিক চাপ প্রয়োগও অব্যাহত থাকে। উল্লেখ্য, ৫ ডিসেম্বর জাতিসংঘে মার্কিন স্থায়ী প্রতিনিধি জর্জ বুশ ভারতকে প্রথম আক্রমণকারী বলে উল্লেখ করেন। ৭ ডিসেম্বর হোয়াইট হাউসে সাংবাদিক সম্মেলনে কিসিঞ্জারও ভারতকে আক্রমণকারী ও বিশ্বাসঘাতক হিসেবে অভিযুক্ত করেন। দিল্লি ও মস্কোর ওপর চাপ প্রয়োগ করতে যুক্তরাষ্ট্র 'এন্টারপ্রাইজ' নামে পারমানবিক জাহাজের নেতৃত্বে ৮টি জাহাজের একটি 'টাক ফোর্স' বঙ্গোপসাগরে পাঠানোর নির্দেশ দেয়। এটা 'টাক ফোর্স-৭৪' নামে পরিচিত। একই সঙ্গে যুদ্ধবিরতির লক্ষে জাতিসংঘে মার্কিন কূটনীতি সক্রিয় থাকে। উল্লেখ্য, যুদ্ধবিরতির লক্ষে জাতিসংঘের নিরাপত্তা পরিষদে ৪ ও ১২ ডিসেম্বর যথাক্রমে প্রথম ও দ্বিতীয় মার্কিন যুদ্ধবিরতি প্রস্তাব উত্থাপিত হয়। কিন্তু সোভিয়েত ভেটোর কারণে দুটো প্রস্তাবই নাকচ হয়ে যায়। ১৯৭২ সালের ৮ জানুয়ারি মার্কিন 'টাক ফোর্স-৭৪' ভারত মহাসাগর ত্যাগ করে। এভাবে বাংলাদেশের মুক্তিযুদ্ধে মার্কিন নীতি একদিকে যেমন বাংলাদেশ বিরোধী ছিল, তেমনি নিজ দেশের জনগণ কর্তৃকও নীতিটি পরিত্যক্ত হয়েছিল।

মুক্তিযুদ্ধে যুক্তরাষ্ট্রের বেসরকারি পর্যায়ে ভূমিকা

নিম্ন প্রশাসন বাংলাদেশের মুক্তিযুদ্ধে বিরোধী শক্তি হিসেবে ভূমিকা পালন করলেও মার্কিন সংবাদপত্র, বুদ্ধিজীবী, রাজনীতিবিদসহ বেসরকারি পর্যায়ে প্রায় সর্বস্তরের মার্কিন জনগণ বাংলাদেশের মুক্তিযুদ্ধের পক্ষে ভূমিকা পালন করেছিল। এমনকি অনেক

আমলাও বাঙালির সংগ্রামের প্রতি সহানুভূতিশীল ছিল। নিউইয়র্কে অনুষ্ঠিত জর্জ হ্যারিসনের 'বাংলাদেশ কনসার্ট' ছিল মুক্তিযুদ্ধের এক বিরাট অনুপ্রেরণা। এভাবে মার্কিন শিল্পী, সাহিত্যিক ও বুদ্ধিজীবীরা নানাভাবে বাংলাদেশের মুক্তিযুদ্ধে সহায়তা করেছিলেন। আমেরিকার নাগরিকরা মুক্তিযুদ্ধের স্বপক্ষে গঠন করে বিভিন্ন সংগঠন। তাদের বাংলাদেশের পক্ষে ভূমিকা পাকিস্তানপন্থী মার্কিন প্রশাসনকে ব্যতিব্যস্ত করে রেখেছিল। মার্কিন রাজনীতিবিদ বিশেষ করে কয়েকজন সিনেটর ও কংগ্রেস সদস্য সরকারি নীতির কঠোর সমালোচনা করেন। এদের মধ্যে উল্লেখযোগ্য হচ্ছেন সিনেটর এডওয়ার্ড কেনেডি, সিনেটর সান্সবে, সিনেটর কেইস, কংগ্রেসম্যান গ্রাস হেলপান ও গালাকার, সিনেটর হ্যারিস, সিনেটর পার্সী, সিনেটর মাকী, ওয়াল্টার মনডেল ও এডওয়ার্ড ব্রুক প্রমুখ।

সুতরাং দেখা যায় যে, মার্কিন সরকারি পর্যায়ে মুক্তিযুদ্ধের বিরোধিতা করা হলেও বেসরকারি পর্যায়ে মুক্তিযুদ্ধের জন্য ছিল ব্যাপক সহানুভূতি। কংগ্রেস, সুশীল সমাজ ও প্রচার মাধ্যমের সতর্কতা এবং প্রশাসনের অভ্যন্তরীণ চাপের মুখে নিয়ন-কিসিগ্গার প্রশাসন পাকিস্তানকে যতোটা সমর্থন ও সহযোগিতা করতে চেয়েছিল ঠিক ততোটা করতে সক্ষম হয়নি।

মুক্তিযুদ্ধে সোভিয়েত ইউনিয়নের ভূমিকা

তৎকালীন পরাশক্তির মধ্যে সোভিয়েত ইউনিয়নই বাঙালি গণহত্যাকে প্রথমে নিন্দা জানায়। সোভিয়েত ইউনিয়ন প্রথম থেকে শেষ পর্যন্ত ভারত তথা বাংলাদেশের মুক্তিযুদ্ধের পক্ষে ভূমিকা রেখেছিল।

বাংলাদেশের মুক্তিযুদ্ধে সোভিয়েত ইউনিয়নের নীতি সব সময় একই গতিতে প্রবাহিত হয়নি। সময় ও বাস্তবতার সাথে সাথে বিভিন্ন সময় সোভিয়েত নীতিতে নানা পরিবর্তন লক্ষ করা যায়। মুক্তিযুদ্ধে সোভিয়েত নীতির তিনটি পর্যায় ছিল।

সোভিয়েত নীতির প্রথম পর্যায় (মার্চ-জুন) : বাংলাদেশের মুক্তিযুদ্ধে সোভিয়েত নীতির প্রথম পর্যায়ে সতর্কতা লক্ষ করা যায়। ১৯৭১ সালের ৩০ মার্চ কমিউনিস্ট পার্টির ২৪তম কংগ্রেসে ব্রেজনেভ ভাষণে 'পূর্ব বাংলার' জনগণের ন্যায়সঙ্গত অধিকারের ভিত্তিতে রাজনৈতিক সমাধানে পৌছার কথা উল্লেখ করেন। প্রেসিডেন্ট পদগর্নি ২ এপ্রিল ইয়াহিয়াকে পাঠানো একটি পত্রে জরুরি ভিত্তিতে রক্তপাত ও নির্যাতন বন্ধ করে শান্তিপূর্ণ সমাধান খুঁজে বের করার জন্য পাকিস্তানকে আহ্বান জানান। ৬-১০ জুন ভারতের পররাষ্ট্রমন্ত্রী শরন সিং রাশিয়া সফর করে রাশিয়াকে বাংলাদেশ ইস্যুতে আরোও সক্রিয় হওয়ার আহ্বান জানান। যদিও এ পর্যায় রুশ নীতি শান্তিপূর্ণ উপায়ে বাংলাদেশ সমস্যা সমাধানের পক্ষে আবর্তিত হয়। জুন মাস পর্যন্ত রুশ নীতি এ ধারায় চলে।

সোভিয়েত নীতির দ্বিতীয় পর্যায় (জুলাই-নভেম্বর) : জুলাই মাসের ৯-১০ তারিখে হেনরি কিসিঞ্জারের পাকিস্তান হয়ে চীন সফর করার পরই উপমহাদেশে কূটনৈতিক বিপ্লব ঘটে। তিনি পিকিং থেকে ফিরেই ঘোষণা করেন ভারত পাকিস্তান আক্রমণ করলে চীন হস্তক্ষেপ করবে এবং আমেরিকা ভারতের সাহায্যে নাও এগিয়ে আসতে পারে। এর ফলে ভারত ও সোভিয়েত ইউনিয়নের পারস্পরিক নিরাপত্তার অভাববোধ থেকে ১৯৭১ সালের ৯ আগস্ট স্বাক্ষরিত হয় রুশ-ভারত মৈত্রী চুক্তি। এ চুক্তি পাকিস্তানকে নৈতিকভাবে দুর্বল করে। রাশিয়া এতো দিন বিবৃতি ও পত্রের মাধ্যমে বাংলাদেশে গণহত্যার নিন্দা, শান্তিপূর্ণ উপায় সমস্যা সমাধানের যে নীতিতে ছিল সে অবস্থান থেকে সরে এসে ভারতের পক্ষে সক্রিয় নীতির দিকে অগ্রসর হয়। পরে মাসে অর্থাৎ ২৭-২৯ সেপ্টেম্বর ভারতের প্রধানমন্ত্রী মন্ডো সফরের পর রুশ নীতির এ অবস্থান আরো দৃঢ় হয়। সোভিয়েত নীতির দ্বিতীয় পর্যায়ে একটি পরিবর্তন লক্ষ্য করা যায়। বাঙালি বিরোধী যে কোনো আন্তর্জাতিক সমাধানের বিরুদ্ধে ভারতের সঙ্গে সোভিয়েত ইউনিয়নও তৎপর হয়ে ওঠে।

সোভিয়েত নীতির শেষ পর্যায় (৩ ডিসেম্বর- স্বাধীনতা পর্যন্ত) : পাকিস্তান ন্যায়সঙ্গত ও শান্তিপূর্ণভাবে বাংলাদেশ সমস্যা সমাধানে ব্যর্থ হওয়ায় সোভিয়েত ইউনিয়ন ভারতীয় দৃষ্টিভঙ্গিকে সমর্থন করে। ৩ ডিসেম্বর চূড়ান্ত যুদ্ধ শুরু হলে সোভিয়েত ইউনিয়ন যুদ্ধের জন্য সরাসরি পাকিস্তানকে দায়ী করে। সোভিয়েত ইউনিয়ন তার সীমান্ত রক্ষা ও জাতীয় স্বার্থে নিষ্ক্রিয় থাকবে না বলেও হুমকি দেয়। যদিও জাতিসংঘ ও জাতিসংঘের বাইরে ভারতকে কূটনৈতিক ও নৈতিক সমর্থন দিলেও সে সময় রাশিয়া একটি বড় ধরনের যুদ্ধে জড়াতে চায়নি। সোভিয়েত ইউনিয়ন এই পর্যায়ও বাংলাদেশের মানুষের ইচ্ছে অনুযায়ী নির্বাচিত প্রতিনিধির (আওয়ামী লীগ) কাছে ক্ষমতা হস্তান্তরকে প্রাধান্য দেয়। পাকিস্তান এ প্রস্তাব প্রত্যাখ্যান করে। যুদ্ধ ভয়াবহ রূপ নিলে সোভিয়েত ইউনিয়ন যুদ্ধবিরতি বিলম্বিত করার সিদ্ধান্ত গ্রহণ করে- যেন ভারতীয় বাহিনী সামরিক বিজয়ের প্রয়োজনীয় সময় ও সুযোগ পায়। নিরাপত্তা পরিষদের পরিবর্তে জাতিসংঘের সাধারণ পরিষদে ৭ ডিসেম্বর একটি যুদ্ধ বিরতি প্রস্তাব উত্থাপিত হলে সোভিয়েত ইউনিয়ন তৃতীয়বারের মত ভেটো প্রয়োগ করে। ভারতীয় বাহিনী ঢাকা দখল করার পূর্ব মুহূর্ত পর্যন্ত যে কোনো প্রকারে যুদ্ধবিরতির পদক্ষেপকে বানচাল করাই ছিল এ ভেটো দানের উদ্দেশ্য। আর তাই ১৬ ডিসেম্বর পাকবাহিনী আত্মসমর্পণ করার পর নিরাপত্তা পরিষদে সোভিয়েত ইউনিয়ন আর ভেটো প্রয়োগ না করায় শেষ পর্যন্ত ২১ ডিসেম্বর যুদ্ধবিরতি প্রস্তাব গৃহীত হয়।

এভাবে দেখা যায়, রুশ নীতি আগাগোড়া মধ্যপন্থী হলেও মুক্তিযুদ্ধের শেষ পর্যায়ে এসে সোভিয়েত ইউনিয়ন কৌশলগত কারণে বাংলাদেশপন্থী নীতি গ্রহণ করে। তবে মুক্তিযুদ্ধে ন'মাস গণহত্যার বিরুদ্ধে ও বাঙালির ন্যায়সঙ্গত দাবির স্বপক্ষে রাশিয়া ভূমিকা রাখে।

মুক্তিযুদ্ধে চীনের ভূমিকা

মুক্তিযুদ্ধ শুরু হওয়ার পরই চীন সরকার কটর পাকিস্তান ঘেঁষা নীতি অনুসরণ করে। যা স্বাধীনতাপ্রিয় বাঙালি বিশেষ করে বামপন্থীদের জন্য গভীর হতাশা সৃষ্টি করে। প্রফেসর সৈয়দ আনোয়ার হোসেন মুক্তিযুদ্ধে চীনের অনুসৃত নীতির দু'টি বৈশিষ্ট্যের উল্লেখ করেন। প্রথমত, চীন মুক্তিযুদ্ধের প্রতি কোনো সহানুভূতি দেখানো থেকে সুচিন্তিতভাবে বিরত থাকে। দ্বিতীয়ত, চীন সরকার দ্ব্যর্থহীনভাবে পাকিস্তান সামরিক চক্রের প্রতি অকুণ্ঠ সমর্থন জানায়। মুক্তিযুদ্ধে চৈনিক নীতির দুটি পর্যায় ছিল।

চৈনিক নীতির প্রথম পর্যায় (এপ্রিল- নভেম্বর) : চীন গোড়া থেকেই রাশিয়ার সঙ্গে ভারতের সম্পর্কের ভিত্তিতে বাংলাদেশ বিষয়ে তার নীতি নির্ধারণ করে। ১৯৭১ সালের ২৫ মার্চ পাকিস্তান হানাদার বাহিনী বাংলাদেশে গণহত্যার সূচনার পর প্রায় ১৫ দিন মৌন থাকলেও ১১ এপ্রিল প্রথম সরকারি প্রতিক্রিয়া ব্যক্ত করে। ওইদিন জেনারেল ইয়াহিয়া খানকে দেয়া এক পত্রে চৈনিক প্রধানমন্ত্রী চৌ এন লাই পাকিস্তানে 'ভারতীয় সম্প্রসারণবাদের' বিরুদ্ধে এবং পাকিস্তানের সার্বভৌমত্ব, জাতীয় স্বাধীনতা রক্ষায় চীন সরকার ও জনগণের সকল সময় সমর্থনের আশ্বাস দেন। পাকিস্তানে সংঘটিত ঘটনাকে তাদের 'অভ্যন্তরীণ সমস্যা' বলে চীন সরকার চিহ্নিত করে পাকিস্তানের উন্নয়ন ও সমৃদ্ধির একমাত্র শর্ত হিসেবে পাকিস্তানের দু'অংশের ঐক্যকে সুদৃঢ় করার উপর জোর দেয়। ন্যাপ সভাপতি মওলানা আবদুল খান ভাসানী মুক্তিযুদ্ধে চৈনিক সমর্থন লাভের চেষ্টা করে ব্যর্থ হন। হতাশ পিকিংপন্থীদের মধ্যে ভাসানীপন্থী ন্যাপসহ আরো কয়েকটি ছোট গ্রুপ বিচ্ছিন্নভাবে সশস্ত্র সংগ্রাম শুরু করলেও চীনের এই ভূমিকার কারণে পিকিংপন্থী গ্রুপগুলোর বড় অংশই প্রকাশ্যে, গোপনে এবং কর্মকাণ্ডের দ্বারা মুক্তিযুদ্ধে বিরোধী অবস্থান নেয়।

যদিও চীন মুক্তিযুদ্ধে আগাগোড়া অত্যন্ত কৌশলী ভূমিকা নেয়। তবে অক্টোবর মাস পর্যন্ত প্রকাশ্যে পাকিস্তান সমস্যা সম্পর্কে মন্তব্য করেনি। এ সময় পাকিস্তানকে গোপনে সামরিক ও নৈতিক সমর্থন অব্যাহত রেখেছে। জুলাই মাসে ড. কিসিঞ্জারের পিকিং সফরের ফলে চীন পাকিস্তানপন্থী নীতিতে আগের চেয়ে সক্রিয় হয়। আগস্ট মাসে রুশ-ভারত মৈত্রী চুক্তির পরিপ্রেক্ষিতে চীন শংকিত হয়ে পড়ে এবং সেপ্টেম্বরে চীন পাকিস্তানকে নতুন করে আশ্বস্ত করে জাতীয় স্বাধীনতা রক্ষার ন্যায়সঙ্গত সংগ্রামে পাকিস্তানকে সমর্থন করবে। যদিও বারবার পাকিস্তানের অনুরোধ সত্ত্বেও চীন পাকিস্তানের সাথে কোন সামরিক চুক্তিতে আবদ্ধ হয়নি। তবে বরাবরের মতো চৈনিক সামরিক, নৈতিক সহায়তা অব্যাহত থাকে। ২৯ নভেম্বর চীনের উপ-প্রধানমন্ত্রী লি সিয়েন নিয়েন পাক-ভারত সীমান্তে উত্তেজনা সৃষ্টির জন্য রাশিয়া ও ভারতকে দায়ী করেন। ১৯৭১ সালের অক্টোবর মাসে জাতিসংঘের সদস্য হয়ে এর পরের মাসেই চীনা প্রতিনিধি দলের নেতা চিয়ান কুয়ান দুয়া দক্ষিণ এশিয়ায় উত্তেজনা সৃষ্টির জন্য রুশ-ভারত মৈত্রী চুক্তিকে দায়ী করেন। ৩ ডিসেম্বর চূড়ান্ত যুদ্ধের আগে পর্যন্ত এ নীতি চীন অব্যাহত রাখে।

চৈনিক নীতির দ্বিতীয় পর্যায় (৩-১৬ ডিসেম্বর) : ৩ ডিসেম্বর চূড়ান্ত যুদ্ধ শুরু হলে চীন অত্যন্ত সক্রিয় হয়ে ওঠে। চীন জাতিসংঘে সরাসরি রাশিয়া ও ভারতের পাশাপাশি বাংলাদেশ বিরোধী অবস্থান নেয়। এ যুদ্ধের জন্য সোভিয়েত ইউনিয়নকে দায়ী করে একে প্রতিহত করার ঘোষণা দেয়। এর ফলে বাংলাদেশ ইস্যু নয় রুশ-চীন দ্বন্দ্বই প্রকট হয়ে ওঠতে থাকে। ৫ ও ৭ ডিসেম্বর সোভিয়েত ইউনিয়ন দু'টি প্রস্তাব উত্থাপন করে। প্রস্তাবগুলোর লক্ষ্য ছিল যুদ্ধ বিরতি মাধ্যমে 'পূর্ব পাকিস্তানের' জন্য একটি রাজনৈতিক সমাধান বের করা। এই প্রস্তাবের বিরুদ্ধে জাতিসংঘে চীন প্রথম ভেটো প্রয়োগ করে। ৫ ডিসেম্বর চীন এক প্রস্তাবে ভারতকে আক্রমণকারী হিসেবে তীব্র ভাষায় সমালোচনা করে। ১৬ ডিসেম্বর বাংলাদেশ স্বাধীন হলে চীন এক বিবৃতিতে 'তথাকথিত বাংলাদেশ' সৃষ্টির জন্য সোভিয়েত ইউনিয়ন ও ভারতের তীব্র সমালোচনা করে।

এভাবে দেখা যায় যে, চীন মুক্তিযুদ্ধের প্রথম থেকে শেষ পর্যন্ত পাকিস্তানপন্থী নীতি গ্রহণ করে। নৈতিক সমর্থন ছাড়াও গোপনে প্রচুর অস্ত্র পাকিস্তানকে সরবরাহ করে। পাকিস্তানি বাহিনী আত্মসমর্পণের পর যে সকল অস্ত্র বাংলাদেশে উদ্ধার করা হয় এর ৬০% চৈনিক এবং ৪০% মার্কিন ছাপযুক্ত অস্ত্র। এর থেকে 'নিপীড়িত জনগণের বহু' হিসেবে দাবিদার চীনের হীন ভূমিকা স্পষ্ট হয়ে ওঠে। পাক-ভারত যুদ্ধের শেষ মুহূর্তে পাকিস্তানকে রক্ষা করার জন্য জাতিসংঘের নবীন সদস্য হয়েও বারবার পাকিস্তানের পক্ষে ভূমিকা রাখে। এমনকি ১৬ ডিসেম্বর পাকিস্তানি বাহিনীর আত্মসমর্পণের ভিতর দিয়ে বাংলাদেশ স্বাধীন হলেও ওইদিনই চীন সরকার এক বিবৃতিতে বাংলাদেশকে 'রুশ-ভারতের সৃষ্টি' বলে মন্তব্য করে।

মুক্তিযুদ্ধে ভারতের ভূমিকা

বাংলাদেশের মুক্তিযুদ্ধে ভারতের ভূমিকা নিয়ে গবেষক ও রাজনীতিবিদের মধ্যে দু'ধরনের মতামত রয়েছে। একদল এতোই আবেগপ্রবণ যে, তারা কিছুতেই স্বীকার করতে চান না জাতীয় স্বার্থে ভারত মুক্তিযুদ্ধে সহায়তা করেছে। দ্বিতীয় একদল বলতে চান বাংলাদেশ প্রকৃতপক্ষে ভারতের সৃষ্টি। মুক্তিযুদ্ধে ভারতের উদ্দেশ্য যাই হোক না কেনো তাদের মানবিক, সামরিক, আর্থিক, রাজনৈতিক ও কূটনৈতিক ভূমিকা যে মুক্তিযুদ্ধকে ত্বরান্বিত করেছে নিঃসন্দেহে তা বলা যায়। মুক্তিযুদ্ধে ভারতীয় নীতির তিনটি পর্যায় ছিল।

ভারতীয় নীতির প্রথম পর্যায় (এপ্রিল - জুলাই) : এ পর্যায়ে পাকিস্তানের বিরুদ্ধে যুদ্ধ ঘোষণার ব্যাপারে কিংবা বাংলাদেশকে সরাসরি সাহায্য দেয়ার ব্যাপারে ভারতের সরকারী মহল আগ্রহী ছিল না। এ পর্যায়ে ১. ভারত সীমান্ত উন্মুক্ত করে দেয়, ২. বাংলাদেশ সরকারকে অবোধে ভারতীয় এলাকায় রাজনৈতিক তৎপরতা চালানোর সুযোগ করে দেয়। এর ফলে মুক্তিযুদ্ধের সময় গড়ে ২০-৪৫ হাজার অসহায়, নিরস্ত্র

মানুষ ভারতে আশ্রয় নেয়। জুন পর্যন্ত শরণার্থীর সংখ্যা দাঁড়ায় পঞ্চাশ লক্ষ। এপ্রিলের শেষ নাগাদ বাঙালি যুবকদের সশস্ত্র ট্রেনিং দেয়া শুরু হয় ভারতের মাটিতে। এছাড়া ভারত এসময় হালকা অস্ত্রও দেয়। মে মাসে ভারতের গোয়েন্দা সংস্থা RAW (Research and Analysis Wing) এর প্রত্যক্ষ তত্ত্বাবধায়নে গঠিত হয় 'মুজিব বাহিনী'। জুনে এদের ট্রেনিং শুরু হয় এবং নভেম্বর পর্যন্ত ট্রেনিং চলে। মুক্তিযোদ্ধাদের ট্রেনিং এবং শরণার্থীদের আশ্রয়ের পাশাপাশি কলকাতায় প্রবাসী সরকার গঠন ও স্বাধীন বাংলা বেতার কেন্দ্র নামে এই সরকারের বেতার কেন্দ্র স্থাপনে ভারত সহায়তা করে। জুন মাসের তৃতীয় সপ্তাহে মার্কিন প্রতিরক্ষা সচিব হেনরি কিসিঞ্জার ভারত সফর করে ভারতীয় প্রধানমন্ত্রী ইন্দিরা গান্ধীর সঙ্গে বৈঠকে মুক্তিযুদ্ধে ভারতীয় সহযোগিতা প্রত্যাহারের অনুরোধ করলে ইন্দিরা তা প্রত্যাখ্যান করেন। এতে যুক্তরাষ্ট্রের সহায়তায় মধ্যস্থতার পথ রুদ্ধ হয় এবং এর ফলে ভারত তার নিজস্ব বিবেচনায় চলতে থাকে।

ভারতীয় নীতির দ্বিতীয় পর্যায় (আগস্ট-নভেম্বর) : জুলাই মাস থেকে ভারতীয় বাহিনী পাকিস্তানের বিভিন্ন সামরিক ঘাঁটি নিয়মিত ধ্বংস করার কাজে আত্মনিয়োগ করে। এ মাসে চীন ও মার্কিন যুক্তরাষ্ট্রের সঙ্গে পাকিস্তান সমঝোতায় পৌছালে সোভিয়েত ইউনিয়নের দিকে ভারত ঝুঁকে পড়ে। ৯ আগস্ট রুশ-ভারত মৈত্রী চুক্তি স্বাক্ষরিত হলে বাংলাদেশ সংক্রান্ত ভারতের নীতি ও কর্মসূচির পরিবর্তন দেখা যায়। ইন্দিরা গান্ধী সেপ্টেম্বরে রাশিয়া সফর করলে মস্কো-দিল্লি চুক্তির আওতায় ভারতকে সহায়তার আশ্বাস দেয়া হয়। ২৩ নভেম্বর ইয়াহিয়া খান ১০ দিনের মধ্যে যুদ্ধ শুরুর ঘোষণা দিলে পাকিস্তানের সঙ্গে ভারতের যুদ্ধ অনিবার্য হয়ে ওঠে।

ভারতীয় নীতির তৃতীয় পর্যায় (৩-১৬ ডিসেম্বর) : ৩ ডিসেম্বর ভারতের বিমান ঘাঁটিতে পাকিস্তান বিমান হামলা চালালে চূড়ান্ত যুদ্ধ শুরু হয়। ৬ ডিসেম্বর বাংলাদেশকে ভারত স্বীকৃতি দেয়। ভারত স্থল, নৌ ও বিমান পথে যুদ্ধ শুরু করে এবং বাংলাদেশের অভ্যন্তরে প্রবেশ করে। পাকিস্তান প্রতিটি ক্ষেত্রেই পরাজিত হয়। ভারতীয় মিত্র ও বাঙালি মুক্তিবাহিনী সম্মিলিতভাবে ১৫ ডিসেম্বর ঢাকা পৌছে। ১৬ ডিসেম্বর পাকবাহিনীর অধিনায়ক লে. জে. আমির আবদুল্লাহ নিয়াজী যৌথ বাহিনীর অধিনায়ক লে. জে. জগজিৎ সিং আরোরার কাছে আত্মসমর্পণ করেন।

মুক্তিযুদ্ধে ভারতের বেসরকারি সহযোগিতা : ভারতের অধিকাংশ রাজনৈতিক দল, সংগঠন, বুদ্ধিজীবী, পেশাজীবী এবং জনগণ মুক্তিযুদ্ধের পক্ষে অকুণ্ঠ সহানুভূতি প্রকাশ করে। সরকারি দল কংগ্রেস ছাড়াও ভারতীয় কমিউনিস্ট পার্টি (মার্ক্সীয়), সোস্যালিস্ট পার্টি, ভারতীয় কমিউনিস্ট পার্টি এবং জনসংঘ মুক্তিযুদ্ধে সমর্থন জানায়। মুক্তিযুদ্ধের পক্ষে জনমত সংগঠন ও শরণার্থীদের আশ্রয়, খাদ্য দিয়ে সহায়তা করে সর্বস্তরের ভারতীয় জনগণ ও স্বৈচ্ছাসেবী সংগঠন। বুদ্ধিজীবীরা 'শিল্পী-সাহিত্যিক-বুদ্ধিজীবী সমিতি' গঠন করে অর্থ সংগ্রহ ছাড়াও জনমত সৃষ্টিতে অবদান রাখেন। ভারতের

একাত্তরের মুক্তিযুদ্ধ

বিখ্যাত সঙ্গীতজ্ঞ পণ্ডিত রবি শংকর মার্কিন যুক্তরাষ্ট্রের লসএঞ্জেলসে বাংলাদেশ কনসার্টের আয়োজন করে ১০ লক্ষ ডলার ভারতের শরণার্থী শিশুদের জন্য দান করেন। বিশেষ করে পশ্চিমবঙ্গের জনগণ 'বাংলাদেশ সেবা সংঘ', 'স্বাধীন বাংলা সংগ্রাম সহায়ক সমিতি' নামে বিভিন্ন সংগঠনের মাধ্যমে সহায়তার হাত বাড়িয়ে দেয়। ভারত সরকার শরণার্থীদের খরচ সংগ্রহের জন্য যে শরণার্থী কর ভারতীয়দের উপর আরোপ করে তা নির্দিধায় তারা দিয়ে বাংলাদেশের প্রতি মমতার বহিঃপ্রকাশ ঘটায়।

এভাবে মুক্তিযুদ্ধের নয় মাস শরণার্থীদের আশ্রয়, মুক্তিযোদ্ধাদের ট্রেনিং ও অস্ত্র দিয়ে, প্রবাসী বাংলাদেশ সরকার গঠনে সহায়তা করে, আন্তর্জাতিক ফোরামে বাংলাদেশের পক্ষে জনমত গঠন করে, সর্বোপরি, চূড়ান্ত পর্বে যুদ্ধে সরাসরি অংশ নিয়ে ভারত-বাংলাদেশের মুক্তিযুদ্ধে অবদান রাখে। ভারত সরকারের ত্রাণ মন্ত্রণালয়ের হিসেবে শরণার্থীদের পেছনে ভারতের খরচ হয় ৩৬৭ মিলিয়ন মার্কিন ডলার। এর মধ্যে ১৭০ মিলিয়ন ডলার বৈদেশিক সাহায্য ছাড়া বাকী ১৯৭ মিলিয়ন ডলার ভারত নিজে বহন করে। প্রশিক্ষণ, রশদ, অস্ত্র খাতে ব্যয়ের পরিমাণ ছিল দ্বিগুণ। বাংলাদেশের স্বাধীনতার জন্য চার হাজার ভারতীয় অফিসার ও জোয়ানের আত্মত্যাগ এবং ভারতীয়দের সহমর্মিতা, ভালবাসার মূল্যমান হিসেবের বাইরেই থেকেছে। ভারত সরকারের নীতির কিছু স্বার্থবাদী দিক থাকলেও এগুলো ছিল অকৃত্রিম। মোট কথা, একমাত্র দেশ ভারত যে প্রথম থেকে শেষ পর্যন্ত বাংলাদেশের মুক্তিযুদ্ধের পক্ষে ভূমিকা রেখেছে।

সহায়ক গ্রন্থ

G.W. Choudhury, *India, Pakistan and Major Powers Politics of a Divided Subcontinent* (New Delhi : The Free Press, 1975)

Mizanur Rahman Shelley, *The Emergence of a New Nation in a Multi Polar World Bangladesh* (Washington : University Press of America, 1978)

Richard Sisson, *War and Secession Pakistan India and the Creation of Bangladesh* (Berkeley : University of California Press, 1990)

Sukumar Biswas (Ed.) *Bangladesh Liberation War Mujib Nagar Government Documents 1971* (Dhaka : Mowla Brothers, 2005)

আবুল মাল-আব্দুল মুহিত, *বাংলাদেশ : জাতি রাষ্ট্রের উত্তর*

মেজর রফিকুল ইসলাম বীরউত্তম, *লক্ষ প্রাণের বিনিময়ে* (ঢাকা : অনন্যা, ৫ম সংস্করণ, ১৯৮১)

এইচ. টি. ইমাম, *বাংলাদেশ সরকার ১৯৭১* (ঢাকা : আগামী প্রকাশনী, ২০০৪)

সৈয়দ আনোয়ার হোসেন, *বাংলাদেশের স্বাধীনতা যুদ্ধে পরাশক্তির ভূমিকা* (ঢাকা : ডানা প্রকাশনী, ১৯৮২)

হাসান হাফিজুর রহমান সম্পাদিত, *বাংলাদেশের স্বাধীনতা যুদ্ধ দলিলপত্র*, ৩য়, ৪র্থ, ৯ম, ১০ম, ১৪তম খণ্ড